

II

ХУЛДАҢАР, ЧАЛДАҢАР, ААР ЧУРТАСТАҢАР

ПАЛАКАНЫҢ ЫРЫ

Палака хыс Дума назы Педотчада чалда чөртір. Педотчаа алахтыртып, ол чарғаа кір партыр. Палаканы индір парарға килгеннерінде, Педотчазар айланып ырлантыр:

Ачых¹ тураа паризаң, паризаң,
Ал халам теезің, Педотча, Педотча.
Ачых тураа парибын, парибын.
Ал халбадың ма, Педотча, Педотча?

Хызылчарға паризаң, паризаң,
Хыйылдырам теезің, Педотча, Педотча.
Хызылчарға парибын, парибын.
Хыйылдырбадың ма, Педотча, Педотча?

¹ Ачинск.

Пил ле палых хайнаанча, хайнаанча,
Пис хати кірдім, Педотча, Педотча.
Пис тее хати кіргенче, кіргенче,
Пір дее көрбедің, Педотча, Педотча.

Ала пуға хайнаанча, хайнаанча,
Алты хати кірдім, Педотча, Педотча.
Алты даа хати кіргенче, кіргенче,
Айлан көрбедің, Педотча, Педотча.

Хызылчарға чит парзам, чит парзам,
Хызыл торғыдаң кип кизем, кип кизем.
Аннаң ибiрiлiп нан килзем, нан килзем,
Анда көрем сыныңны, Педотча, Педотча.

Ачых тураа чит парзам, чит парзам,
Аарлығ торғыдаң кип кизем, кип кизем.
Аннаң айланып нан килзем, нан килзем,
Анда көрем ни сыныңны, Педотча, Педотча.

ЧОХ-ЧООС КІЗІНІҢ ЫРЫ

Паары сарығ хусхаахтар
Палғастығ чирде нимістіг,
Пайы чох миндег чох-чоостар
Пайның ибінде илегліг.